


四川名勝志

廿四

嘉定州

州

九冊



漢書門	二	三	六	八
類	九	三	八	七
號	冊	架	函	冊

內閣文庫	二	三	六	八
漢書	九	三	八	七
類	冊	架	函	冊

內閣文庫	漢	2368
冊數	93	(84)
函號	291	35

明名勝志八十四




A 1 2 3 4 5 6 M 8 9 10 11 12 13 14 15 B 17 18 19



Kodak Gray Scale



© Kodak, 2007 TM: Kodak







四川名勝志卷之二十四

嘉定州南道屬

閩中曹學佺能始著


淺草文庫

嘉定州

直隸布政司在省城東二百六十里

領縣六

漢犍為郡之南安縣地治青衣江會應劭注漢書曰順帝改青衣縣為漢嘉以公孫述稱帝青衣人不賓光武嘉之也後魏于此置眉州宇文周始改嘉州宋寧宗潛邸陞嘉定府今仍其名為州○寰宇記云嘉州治龍游縣隋初伐陳有龍見江水引軍故名對州治四十有平羗縣本漢平羗戍也後



周置縣旋廢按今州之屬通運所是龍游縣址平
羗驛是平羗縣址○水經曰江水至犍爲武陽縣
青衣水沫水從西南來合而注之酈道元注云江
水又東南逕南安縣西有熊耳峽連山競險接嶺
爭高河平中山崩地震江水逆流懸概有灘名壘
坻亦曰鹽概李冰所平也縣治青衣江會襟帶二
水矣○華陽國志云青衣有沫水出濛山下伏行
地中會江南安觸山脇溷崖水脈漂疾破害舟船
歷代患之李冰發卒鑿平溷崖通正水道或曰冰
鑿崖時水神怒冰乃操刀入水中與神鬪至今蒙

福按漢書溝洫志蜀守李冰鑿離峯避沫水之患
晉灼云峯古埽字卽此○寰宇記云青衣水發源
自瀘山徼外東南流逕嚴道洪雅夾江至龍遊與
岷江合沫水發源大渡河一名峩水自陽山縣流
入江按青衣沫水合流在州西十五里俗名尖山
其下爲紙房楮薄如蟬翼而質堅可久○通志云
嘉定州治在兩川合流之際晉郭璞所定治東有
八卦井卽璞所鑿○水經注云蜀王開明故治也
來敏本蜀論曰荆人鼈令死其尸隨水上荆人求
之不得鼈令至汶山下邑復生起見望帝望帝者

杜宇也從天下女子朱利自江源出爲宇妻遂王于蜀號曰望帝望帝立黿令以爲相時巫山峽壅而蜀水不流帝使黿令鑿巫峽通水蜀得陸處望帝自以德不若遂以國禪號曰開明○蜀記云古夜郎國傳爲一女人浣溪有竹浮下而中啼聲取而視之則孩也及長呼爲夜郎封竹溪王今治北三里有竹公溪按宋祁荅勸農李淵宗嘉州江上見寄詩嘉月嘉州路荊峩接畫船山圍杜宇國江入夜郎天卽詠此事○輿地廣記云漢武帝開夜郎置犍爲郡漢書地里志夜郎故縣乃屬犍荊郡

如此則今之嘉州犍爲縣遂以爲夜郎國恐失真○蜀志補罅云嘉州十五景唐貞觀中刺史盧士瑄記曰望靈峯曰西嶺精舍曰石梁水曰後壑曰分溪塘曰桂竹汀曰梭原曰茗岡曰六度潭曰長林閣曰望山臺曰青雋徑曰山樵園曰石壑院曰南洲草堂併賦詩刻之石上宋鄧諫從云天下山水窟有二曰嘉定曰桂林鮮于繪議道堂記云漢嘉背負三峩襟帶二江爲西南州最清歸處○海錄碎事載僞蜀歐陽彬出領嘉州曰青山綠水中爲二千石作詩飲酒爲風月主人豈不佳哉其後

太守呂昌朝以宋復古所畫八景圖皆天下名勝懸于州治與相映發蘇子瞻有八咏繼東吳之贈○蜀都賦云戶有橘柚之園注曰出犍爲南安縣華陽國志南安有柑橘官社出名茶○寰宇記云有石碑山亦名海棠山山上徧植海棠爲郡守宴賞之地花譜云海棠有色無香惟蜀之嘉州者有香○吳中復戒石云嘉州出荔枝輿地紀勝有荔枝樓愛日叢叢抄云宋乾道間陸放翁取家藏前輩筆札盡刻石置荔枝樓下○方輿勝覽云梨花山過西津橋五里有百餘樹人遇寒疾取此花食

之卽愈岑參過西津王判官所居詩勝迹不在遠愛君池館幽素懷茗中語宛得塵外遊○蓮花山在治東八里山陽有溪四時不涸產蓮花爲盛○樓臺解榭雅與勝會者曰都督府唐子邵序云犀灘古地熊臯外虞長空青冥通波萬里○郡齋平望江山岑參詩山光圍一郡江月照千家○日丁東院在州學前院有方響洞洞腹有水如環珮聲黃魯直詩古人題作丁東水自古丁東直至今我爲更名方響洞信知山水有清音范成大詩隔凡水碓不可越衆真微步壺中月徙倚含風玉佩聲

何須聽作狴賓缺自注云漢嘉廣佛院中水洞有聲琅然莫知其所由來舊名丁東水山谷易今名且有詩也石介詩云萬樹芙蓉秋色裏千家方響月明中○澄江樓在憲司左窺龍泓右瞰烏尤高明爽塏得江山之趣宋淳祐間提刑程逢辰摹刻蘇子瞻書其外祖程公逸事于此○明月樓在譙樓之右下瞰明月湖郭璞識云鬱姑鬱姑將州對洛都但看千載後變成明月湖後隋鬱姑將軍始開此湖也洛都山名在州西五里○日璧津樓宋郡守游仲鴻建魏了翁記在治東南跨城爲樓下

瞰江流三峩九頂森列左右○日萬景樓在高標山上高標一名高望郡之主山也有弘明觀後周所創隋大業末方製大殿塑飛天神王像無名氏記其神異甚詳樓爲宋郡守呂由誠建宇文粹中記范成大云嘉州城中山上登覽勝絕殆冠西川余令畫工作圖以歸山谷山谷來游時但有安樂園未有此樓也後人立涪翁亭在此樓前于是游觀之勝稱極備焉○日月榭陸務觀詩試傾萬景湖亭酒來看半輪江月秋爲同年王子蒼作也注云傍榭有一巖景趣尤佳子蒼欲作樓未果○其

曰碧雲亭在石筍之隙楊暈記云石挺出于山旁高丈有二尺上銳而下廣衆水滙于前左右視羣山之灑迤若覆盂于地○熊耳平羗據其上流寰宇記云熊耳水一名熊耳峽古老言武侯鑿山開道卽熊耳峽東古道也又云平羗縣本漢平羗戎在榮州應靈縣界深谷成是也周保定間置縣隋大業三年獠叛移就大江唐寶曆中又移于開峽驛道書謂之平羗化山圖經云天下二十四化之一也有太白亭相傳太白讀書于此黃魯直作亭其上蘇軾詩云峩峩山月半輪秋影入平羗江水

流謫仙此語誰解道請君見月時登樓○石闕堂溪環遶其趾郡國志云龍游縣有二石闕卽漢武帝使唐蒙下夜郎置碑曰云嘉州舊市鎮石闕上有唐李德裕領重兵過此九字寰宇記云石堂溪水在縣東一里源出溪泉流入明月湖亭退入流花橋注于大江薛能石堂溪詩三面枕漁樵前門向郡橋岸沙崩橘柚山徑入茶苗夜擁軍烟合春浮妓舸邀此心無與醉花影莫相饒○九頂烏尤築立捍流方輿勝覽云九頂山在州城左有九峯曰鳳集棲鸞靈寶就日丹霞祝融擁翠望雲允說

唐會昌已前峯各有寺今惟存凌雲一寺又名大像寺開元中僧海通于瀘江沫水濛水三江之合衝濤怒浪之濱鑿山爲彌勒大像高踰三百六十六尺建七層閣以覆之至韋臯帥蜀積十九年而工始備臯有大像記墨莊漫錄云嘉州凌雲寺大像記韋臯文張綽書其碑甚豐字畫雄偉頃于潘義榮處見之岑參詩寺出飛鳥外青楓戴朱樓搏壁躋半空喜得登上頭始知宇宙濶下看三江流天晴見峩峩如向江上浮迥野煙景豁陰森棕楠稠願割區中緣永從塵外遊回風吹虎穴片雨當龍

漱僧房雲濛濛夏月寒颼颼迴合俯近郭寥落見遠舟發槩無端倪天宮可淹留一官詎足道欲去令人愁薛能詩像閣與山齊何人置石梯萬烟生聚落一崦露招提霽月人來下殘陽鶴去栖從邊亦已極烽火是沉黎司空曙詩春江古寺遶滄波石磴盤空鳥道過百丈金身開翠壁萬龕燈焰隔烟蘿雲生客到侵衣濕花落僧禪覆院多不與方袍同結社下歸塵世竟如何宋陸務觀有泉鏡自涵螺髻綠浪花不犯寶趺塵之句自注云一泉泓然正在髻下每歲水漲不能及佛足碑目凌雲

山麓有唐放生碑山頂有清音亭邵博記云天下山水之勝在蜀蜀之勝在嘉州嘉州之勝在凌雲寺寺之南山又其勝也蘇子瞻名其亭曰清音又南山之勝也其下有治易洞東坡磨崖大字云聖作易晦其數劉傳吳識易祖蓋謂郡守吳秘得之于劉牧耳○紀勝云烏尤山一名離堆山在九頂山之左舊名烏牛突然水中作犀牛狀至山谷題涪翁亭始謂之烏尤又名烏龍郭璞移水記曰世王播遷戎羯亂華于是優游笑傲放意山水間乃于嘉州城東百步烏龍山鑿書巖焉蘇子由詩亦

指其注爾雅于此史謂璞無入蜀之文按移水記有嘉州二字則似非璞手筆恐後人之附會耳蓋嘉州之名始于後周而自周已前止曰漢嘉郡曰龍游縣耳安得所謂嘉州哉子由詩云巉巉九峰頂可愛不可任飛舟過山足佛脚見江滸俄頃已不見烏牛在中渚移舟近山陰峭壁上無路云有古郭生此地苦箋注洗硯去殘墨徧水如黑霧至今江上魚頂有遺墨處提刑張方詩竹橋沙水度烏尤絕壁孤崖意氣驕故與凌雲分半坐僧窓假寐見金焦以其似金山焦山也○青衣石峽循而

東去東觀漢記元初六年五月青衣蠻唐律歸義
注云地在大江青衣二水之會今嘉州龍游縣也
寰宇記云青衣津在治南四十里有青衣神益州
記云神號雷埏廟卽華陽國志之雷垣也班固以
爲離堆下有石室名玉女房蓋此神耳岑參上嘉
州青衣山中峰題惠淨上人幽居寄兵部楊郎中
詩序云青衣山在大江之中屹然迥絕崖壁蒼峭
周廣七里長波四匝有惠淨上人廬于其巔惟繩
牀竹杖而已恒持蓮華經十年不下山余自公浮
舟聊一登眺友人夏官弘農楊侯清淡之士也素

工爲文獨立于世與余有方外約每多獨徃之意
今者幽躅勝槩歎不得與此公俱爰命小吏刮磨
石壁以識其事乃詩以達楊友爾詩云青衣誰開
鑿獨在水中央浮舟一躋攀側逕緣穹蒼絕頂詣
老僧豁然登上方諸嶺一何小三江奔茫茫蘭若
向西開峩嶵正相當猿鳥樂鐘磬松蘿泛天香江
雲入袈裟山月吐繩牀早知清淨理久廼機心忘
尚以名宦拘聿來夷獠鄉吾友不可見鬱爲尚書
郎早歲愛丹經留心向青囊渺渺雲智遠幽幽海
懷長勝賞欲與俱引領遙相望爲政愧無術分憂

幸時康君子滿天朝老夫憶滄浪况值廬山遠抽簪歸法王或云青衣卽烏尤山○方輿記云東巖在城東佛峽卽聖岡山薛能詩古蹟是何王平身入石房遠林通後逕一郡隔前岡晝靜惟禪客春來有女郎獨醒回不得無事可焚香巖半有洞出泉清冽宜釀東坡詩一時付與東巖酒卽此陸務觀記能仁院前有石像高丈餘盖作大像時式也詩云江閣欲開千尺像雲龕先定此規模斜陽徙倚空三歎嘗試成功自古無○碑目東津院有黃魯直草書圓照大師小碑詩云赤旃檀塔六七級

白齒苔花三四枝禪客相逢以彈指此心能有幾人知又云黃太史自敘南經此有所作墨竹記○余觀嘉州新志城西一里有揚雄山石洞幽邃相傳以爲子雲遊此有子雲草亭蔡植詩云獨步城西路蕭條一草亭古苔環徑碧修竹遶軒青石鑿觀書所碑鐫陋室銘草玄今已矣千載想儀刑州城東北四十里有麻平河流出千佛巖與泥溪合王勃麻平曉行詩云百年懷土望千里倦游情高低循戍道遠近聽泉聲礮葉纔分色山花不辨名羈心何處盡風鶯暮猿清泥溪詩云弭棹臨奔壑

低鞭躡峻岐江濤出岸險峯磴入雲危溜急船紋
亂崖斜騎影移水烟籠翠渚山照落丹厓風生蘋
浦葉露泣竹潭枝泛水雖云美勞歌誰復知

峩眉縣

在州西
八十里

任豫益州記云峩眉山在南安縣界兩山相對狀
如峩眉張華博物志以為牙門山也本傳云昔善
財禮德雲比丘時佇立妙高峰觀此山如初月現
故稱峩眉○益州記云隋開皇九年立峩眉縣以
山為名縣在南安之西峩眉之東唐乾元間獠叛
移就峩眉觀東今縣理是也○禹貢梁州之山四

岷嶓蔡蒙西山皆岷北山皆嶓南山皆蒙峩眉之
在禹貢則蒙山之首也○飛行羽經曰峩眉之山
金臺之室飛玄羽經秘其內稽神樞云句曲洞天
西通峩眉皆大道也其間有小徑襍路阡陌抄會
非一處華陽國志云峩眉山孔子地圖言有仙藥
漢武帝遣使者祭之欲致其藥不能得碑目云宋
太宗峩眉山晉賢殿簡版書天真皇人論道之地
楚狂接輿隱迹之鄉按雜花經云諸佛如來以大
悲心而為體故因于衆生而起大悲因于大悲生
菩提心因菩提心成等正覺故我世尊等正覺而

有方所說經而有道場晉賢于道場開化人天等衆故現相海于峩眉山中密引世人而通菩提覺性○三皇經云皇人者泰帝之所使在峩眉山黃帝往受真一五牙之法○費士幾歌鳳臺記云按晉皇甫謐高士傳葛洪神仙傳宋劉孝標注世說皆以接輿爲避楚入蜀隱于峩眉不知所終也○寰宇記云中峨山在峩眉縣南二十里又名覆蓬山有葛仙洞八穴初纔容人行數里漸寬洞中蝙蝠大如箕又十里之小峩山一名鑷亦山山有季仙洞○李膺益州記云龍門山在峨眉山西十里兩

崖峭峙其形如削仰視青天纔餘一罅又云峩眉山下有池廣袤十里號龍池○方輿記云綏山廢縣在峩眉縣西四十里按列仙傳葛由周威王時人好刻木爲牛賣之一日騎木牛見人蜀中王侯追之上綏山綏山在峩眉山西南其高無極隨之者不復還皆得仙道諺曰得綏山一桃雖不得仙亦足以豪○水經注云峩眉山有濛水卽大渡水也水發蒙漢東西流與泚水合逕汶江道呂忱曰泚水出蜀許慎以爲泚水也從水泚聲南至南安入大渡水大渡水又東入江○通志云羅日河出

峩眉山麓右溪自小天池以東左溪自黃毛坪以北至羅目廢縣界合二溪之委爲江水石甚竒怪縣址去治西九十里唐麟德置宋省入○寰宇記云隴寧山在羅目縣東南七里神仙傳云宿山圖者隴西人也採藥此山服之羽化○嘉樹在羅目縣東南三十里陽山江漑兩樹對植圍各三二尺上引橫枝亘二丈相援連理陰庇百夫其名曰黃葛號嘉樹蘇子由詩余生雖江陽未省到嘉樹卽此○夷惜水在羅目縣東北五十里源出雋州界中有嘉魚長三尺每年二月隨水而下八月逆水

而上八穴蜀都賦云嘉魚出于丙穴是也○謹按名山記峩眉山周匝千里石龕百一十二大洞十二小洞二十八南北有臺凡遊大峩者自縣勝峯門出至華嚴院恰十五里前代于峩眉山劔寺六光相居山絕頂爲游山之底極華嚴居山之前峯爲游山之嚮導而白水寺居其中自白水至光相歷八十四盤山徑如線如是者六十里至峯頂卽晉賢示現處屋皆以板爲之學佳以萬曆辛亥歲遊是山作記云出嘉州之西門爲峩眉徑而峩愈用自遠遇津焉絕流者二揭衣者一旣入縣縣田

食堰水膏液雲油有沃益之稱遇嶺焉閣覆于上
宋時建魏華父書也首坡名解脫以出山者釋危
就坦至此而盡噫余惡知乎出解脫入解脫耶過
此爲華嚴寺卽華嚴堦爲純陽殿殿前頰谿有石
如船水出灌堰石上龍門二字蘇子瞻書又過爲
中峯寺卽乾明觀黃魯直居之爲歌鳳臺列仙傳
所稱楚狂接輿隱于峩峩山中不知所終也陳希
夷福壽字殊俗筆峩石神水亦云謂又過爲雙飛
橋山中橋非一此可稱橋一橋受一水一水自一
洞來有黑白之分若挾而舞若搏而赴勢不相下

過橋始狎久之乃濟有石狀如牛心受水所激而
成有前後牛心寺前者白水而後者黑水也謂之
符文水孫思邈居于白水今之萬年寺卽白水寺
由山下至寺一舍而遙倍之而近如循墻自牖以
達堂窻每遇一嶺輒如止扉寺前爲四達而內則
大宮也其地皆稻田塍埒俯仰隈隩氣候和暖不
異于外有蒲氏村蒲人居之云漢蒲公之後蓋權
輿是山爾出寺至明月池俗名初喜亭其嶺蔓延
行之無盡石磴難數始治終亂騎已絕輿用二十
許人舁蹲處于內不能蔽軫劣似輿形者耳首十

人不任輿以舟視輿背如弓繩如弦猶不滿輿者
意左右八人翼伸縮如猿臂莫知定向輿首者察
路如察脈常苦眩次者如眩師或亟跳出輿外或
僂入輿內或同左右前後爲一井計二十人之形
如鴻鴈木葉偶成文字莫知所以又或作十數層
如懸線或擁腫一處如木瘦也輿不可以足代足
不可以手代扶余行者不善地以善讓于余善在
左則棄右者善在右則棄左者亦有時而下下不
十上之一輿相詬厲彌甚首者拊不任輿者背如
相瞽然留十數人後後者躡石石隨足下擊前者

足驚全輿前者交平地欲趨後者未脫險不能從
出初喜亭至化城寺俗名木皮殿徑一嶺狹束如
溝水所流注多磊砢善脫足謂之滑看溝也由木
皮殿至雷洞坪行者禁聲有禁聲碑輿二十人他
輿者半共百五十人俱行篋篠灌莽中若不相顧
若夢與人語而人不應其木連困糾紛或寓或族
或相切磨或自斃死或翹繚而句或無枝而檄每
上一嶺不能半望若青天則有樹立于旁爲客繇
役而惺盱也木皮殿以上磴不能石疊木如馬齒
雷洞坪以上樹不能枝向空如虎爪由雷洞坪至

天門石路詰曲爲八十四盤峭直纔減半梧丘當途或出其前或出其後又或出其左右而還之輿者實則輿向空久始實輿者空則輿趾礪地有聲而過門以外爲娑羅坪娑羅其葉冬青其花蒼荀其色赤白木皮殿以上皆有之然有裸樹故不之稱稱天門天門樹娑羅三之二松居其一有一樹枯而復榮定者居之將合無迹也門內有橋曰天橋有井曰井絡有臺曰光相臺有鐵瓦殿昔建有銅殿今建有菴以棲禪者余登乎臺焉其穆穆肅肅者耶其明明斤斤者邪其見乎蒼蒼之色不在

穹窿者耶其于世也悠悠洋洋者耶前之岷江大出而尾下也背之瓦屋上正而平章也遠之雪山濺浮而汨沒也余何以知朱明之別于玄英又何以知臯且之別于辜涂又何以知霾曠霽霽之相終始何以知蟠螭挈貳之自消息又何以知弁日覆雲之不爲暈氣五采耶又何以知人世之雕繪而繡錯目眩而心亂者之有異乎此耶噫觀止矣

□陳子昂感遇詩金鼎合神丹世人將見欺飛飛騎羊子胡乃在栽眉變化固非顛芳菲能幾時疲痾苦淪世憂悔日侵淄眷然顧幽褐白雲空涕洟

又浩然坐何慕吾蜀有峩眉念與楚狂子悠悠白
雲期時哉悲不會涕泣久漣洏夢登綏山穴南采
巫山芝探元觀羣化遺世從雲螭婉變時永矣感
悟不見之李白峩眉山詩蜀國多仙山峩眉邈難
匹周流試登覽絕怪安可悉青冥倚天開彩錯疑
畫出泠然紫霞賞果得錦囊術雲間吹瓊簫石上
弄寶瑟平生有微尚觀笑自此畢煙容如在顏塵
累忽相失儻逢騎羊子携手凌白日鄭谷峩眉山
詩萬仞白雲端經春雪未殘夏消江峽滿晴照蜀
樓寒造境知僧熟歸林認鶴難會須朝闕去祇有

畫圖看賈島送譚上人下視白雲時山房掛樹皮
垂枝松落子側頂鶴聽棋清淨從沙劫中終日未
歇金光明本行同侍出峩眉□佞有前後峩眉二
歌前峩眉山歌金陵爲松谷上人作峩眉山上月
千里若爲看峩眉山上雪萬古逼人寒山青始黛
雪如粉明月鏡中何隱隱雙峯縹緲誰畫眉挂在
長空不可盡西域雪山絕嶙峋此中應見西方人
晉賢菩薩行具足三千徒衆皆應真始信峩眉自
惆悵不作巫山神女身八十四盤娑羅樹花開如
繪復如素一間版屋千重嶺正值行人問山路登

山路轉難投寺日已晚古苔如髮長新松學蓋偃
冰窟炊不成雷洞眠難穩真僧入定久行脚乞食
遠鉢裏龍形小巖前鳥聲嘯雨氣沈如墨雲光疾
似電應有千化身故作百寶現橋梁宛虹架樓臺
疑蜃變天竺皆騎象星光盡散燕奕奕九微燈焚
焚五色線人人爲攝受各各覩顏面欲知色是空
色卽空中滅世事如幻影詎必歎竒絕依舊峩峩
山明月照清澈君來白門秋山月幾圓缺浩浩江
水流尚帶峩峩雪□後遊峩峩歌君不見太行誠
險阻西蜀峩峩羞與伍又不見雪嶺長晶瑩來映

峩峩一段青禹貢蒙山此稱首梵語勝峯傳日久
洞天列在位之七秀色甲乎州有九君不見軒轅
氏跪謁皇人叩玄旨又不見鬼谷子著書瑤琿藏
洞裏隴西山人宿山圖採藥山中顏色殊葛由賣
羊從此去接輿歌鳳胡爲乎君不見子規啼處竇
誼悲夜啼竹裂人不歸又不見崑崙伯仲未可分
逸少曾詢周撫軍唐家子昂稱詞伯青蓮居士李
太白徃徃見諸吟詠間白頭欲返青山宅豈是峩
峩善妬人江水茫茫難問津我今來遊亦偶爾不
然惆悵蜀國將三春三春花已謝木冰猶未嫁五

月披重裘四時無一夏娑羅鬪雪開松枝受風亞
仙僧如故常客子驚云乍乍見自遲迴人生不再
來足篆符文水身居光相臺井絡金莖下天門玉
藥開願言獻北極千秋萬歲杯

夾江縣

在州西北
八十里

隋于夾江戍置縣蓋分龍游平羗之地亦曰涇上
郭璞注山海經云夾水出于其陰也○本漢南安
縣地今之南安鄉沿其名史記年表宣虎以破臧
荼功食邑于此○志云青衣水來遶縣界而飛水
溪注之溪源出瀑布泉狀如素練李太白所謂瀑

布天落半與銀河爭流者耶而鳳凰天馬虎履伏
龜諸山或舞或翥或蹲或處左右而挾持之過當
縣城下稍平坦宋謝達夫詩兩峰懷抱揖平川卽
此過而東南三十里乃作簾鉤之狀晉張神君謂
日移紅影在簾鉤者也○道書云平岡化依鳳凰
山亦謂之依鳳岡及桐梓林山下有石湫門及石
筍雷柱可以禱雨右在縣南十里○通志云天馬
山其勢飛騰似天馬一名馬鞍山在縣東二十里
○本縣形勝云青衣水遶于南黑虎山峙于北○
福地記云伏龜山有仙掌洞相傳李阿真人所遺

宋人書其壁云跨龍門飲蠡泉摩仙掌扣丹竈○
本志云治西二十五里南安鎮卽漢南安縣治有
鄧通宅故址前有瑪瑙溪中有磐石可以脩禊○
寰宇記云夾江縣本漢南安縣地卽封宣虎爲侯
之邑隋開皇中分龍游平羗二縣置于涇上臨江
水故號夾江按涇水昔秦惠王得蜀移秦人萬家
以實之秦人思故鄉水乃呼此水爲涇水也唐天
寶六年改爲秦水史記年表宣虎以破臧荼功食
邑于此○碑目云漢和帝時開道碑在夾江縣西
青衣越嶲道界中有永和七年永和八年等字○

漢楊宗暢墓碑在縣東二十里墓前兩闕其左右
皆隸書按碑有亭亭內碑二通前立二石柱一云
漢故益州太守楊府君諱宗字德仲墓道一云漢
故中宮令楊府君諱暢字仲晉墓道皆隸書大字
○揚雄賦云五兀參差左太冲賦躡五兀之蹇澹
本志以爲縣北隅五兀山當之○後漢書費貽宅
著草生焉常有五色雲氣覆其上貽益不屈于公
孫述者犍爲郡之夾江人

洪雅縣

在州西南
一百里

取洪雅川爲名隋所置縣說文離卽雅字志云離

堆川流東西屈曲百三十里而後入大江所謂洪雅川也○碑目云古夷獠誓碑在洪雅縣市中又云漢靈帝時張道陵碑在縣之易俗鄉有嘉平二年三月一日等字○縣西十里脩文山卽雅江所注驚湍怒濤名曰龍潭漁者不敢入又二十里竹箐山石甃梯磴盤折而上其地多竹又十里隱蒙山晉處士龐居正字隱蒙隱此○又二十里爲花溪發源自瓦屋山與青衣合可望雪嶺積雪經年不化范忠宣詩雲堆雪嶺鋪銀界日射金仙照碧津又二十里思經山與雅安分界山趾有廢嚴道亦名主簿山

犍爲縣

在州城南一百里

津

左思蜀都賦東越玉津注云江出璧玉故名華陽國志蜀有七津之一也今之犍爲縣兼有玉津縣矣陸務觀舟過玉津詩玻璃江上送殘春疊鼓催帆過玉津宋白爲玉津令貽田表聖詩玉津縣裏三年悶金粟山前九月愁○今縣治在沈犀山上

寰宇記云昔有犀牛渡到此上沈一名沈犀灘志云沈犀洞在沈犀山下上有赤壁數丈下有玄水千尺○縣有石人蜀記云昔諸葛亮征蠻中十里刻一石人今黎嶺之路尚有存者陳羽城下聞夷歌詩犍爲城下牂牁路空冢灘西賈客舟此夜可憐江上月夷歌銅鼓不勝愁○郭璞記云犍爲縣北百里書樓山是孔子背書樓○本志云子雲城在縣南三十里昔揚子雲避亂于此後人增築爲城今水月寺是其故址○碑目云孝女碑在犍爲縣清溪口揚洪出下東漢永建初孝女叔先雄以

父尼和墜湍水尸喪不歸于湖處自投水死後五日與父屍相持浮江上郡表言爲雄立碑宋元祐中重立本志云清水溪在縣南十里流至孝女渡入江○神異傳云趙昱嘗隱青城山隋煬帝起爲嘉州太守時犍爲潭中有老蛟爲害昱率甲士千人夾江鼓譟持刀入水有頃江水盡赤昱左手執蛟首右手持刀奮波而出隋末隱去不知所終後嘉陵水漲人有見昱青霧中騎白馬從數獵者于波面過宋太宗封神勇大將軍廟食灌江口○碑目云犍爲縣東南四十里有唐大佛寺寺中菊坡

二大字乃袁天綱筆○通志云宋邵博墓在犍爲縣博爲制置司叅議卒葬于此康節嘗言世亂惟蜀可居宣和末伯溫携家人蜀止于嘉州今紫雲城有故宅基○杜甫宿青谿驛懷張員外十五兄漾舟千山內日入泊枉渚我生本飄飄今復在何許石根青楓林猿鳥聚儔侶月明遊子靜畏虎不得語中夜懷友朋乾坤此深阻浩蕩前後間佳期付荆楚自注云青溪驛在嘉州犍爲縣崔塗秋日犍爲道中久客厭岐路出門吟且悲平生未到處落日獨行時芳草不長綠故人無重期那堪更南

渡鄉國已天涯范智能犍爲江樓河邊堵立看歸蓬三老開頭暮欲東漲水稠灘連峽內淺山浮石似湘中無人驛路榛榛草有客江樓浩浩風種落塵消少公事賸裁新語寄詩筒蘇軾犍爲王氏書樓詩樹林幽翠滿山谷樓觀突兀起江濱云是昔人藏書處磊落萬卷今生塵江邊日出紅霧散綺窗畫閣青氛氲山猿悲嘯谷泉響野鳥嚶戛巖花春借問主人今何在被甲遠戍長苦辛先登搏戰事斬馘區區何者爲三墳書生古亦有戰陣葛巾羽扇揮三軍古人不見悲世俗回首蒼山空白雲

威遠縣

在州城西
二百里

縣有中峯峯巒峭拔又有中溪溪水幽清寰宇記
 云縣東十五里葛仙山古志相傳葛仙翁曾游其
 地舊設觀仙臺碑刻剝落○山居錄云威遠李圃
 淳熙中以忠州別駕歸隱白茅山中築秀發齋吟
 詠自適齋銘曰前山特秀入我牕戶朝來爽致起
 我幽趣望天宇之澄明何迷途之獨悟挂願終日
 為蝶為周兩忘之矣聊舉扇以自障豈西塵之能
 汚行歌山中采其薇矣雲外飛鴻悠然來去而弋
 人何慕哉

榮縣

在州城東
二百里

蜀地不宜松而榮州之松獨著紀勝曰榮黎松樹
 如龍盤陸游詩柎根橫走松倒植故擅有其奇狀
 矣○曰榮黎曰榮隱曰榮德所謂三榮也寰宇記
 云榮黎山在州東十五里山上有龍池池邊有松
 如盤龍竹亦有如龍形者俗謂之羅漢杖碑目云
 榮黎山古寺碑唐元和禱雨碑俱在本山上○榮
 隱山在治西三十里一名石筠無名氏石刻云筠
 山高極入穹蒼人道虎為殃行人過此不曾傷咸
 陽宮闕在平地高鹿食人無數計吁嗟苛政猛于

虎斯言垂萬古古有榮隱先生修道于此石室猶存碑目有榮隱山修道觀石碑○榮德山在治東北四十里為陳搏修真處山在谷中獨拔五百餘丈中有希夷觀老君祠刻石為像有石室二十四龍池千葉蓮花自小路至山巔以木為梯半山有唐刺史薛高丘磨崖碑開元二十年立○碑目有唐貞元二年建榮縣碑今移植于東橋有榮州院碑偽蜀司倉參軍苟延慶撰○學宮後蓮宇山有宋人九域圖碑舊學桂林山有衡陽王書文明碑○真義侯碑唐元和二年立舊經云卽古蜀將獨

孤白馬二人廟○大周聖德勒石碑在州衙子城門外長安三年韋縠撰文○劉兼登郡樓詩偶奉綸書蒞旭川郡樓佳致盡依然松欹鳥道雲藏寺月滿漁舟水浸天望帝古祠花簇簇錦城歸路草芊芊有時倚檻垂雙袂故國風光似眼前○陸務觀自序其詞云三榮郡治之西因子城作樓觀曰高齋下臨山村蕭然如世外余留十日被命參成都戎幙而去臨行徙倚竟日作桃源憶故人一首所謂衰翁老去踈榮利絕愛山城無事也○城北有橫溪閣務觀閣上小宴沁園春詞引云橫溪閣

者跨于雙溪之上也一自西來其水濁一自東來其水清二水合流于城下爲閣以頰之其北鳳鳴山則黃魯直所題榮川祖無大師此君軒在焉紀勝云鳳鳴之竹多茂實言此竹結實有鳳來棲也魯直詩云王師學琴三十年響如清夜落澗泉有酒如澗客滿門不可一日無此君當時寺栽數寸碧聲挾風雨今連雲此君傾蓋如故舊骨相竒怪清且秀程嬰杵曰立孤難伯夷叔齊采薇瘦霜鐘堂上弄秋月微風入絃此君說君家周彥筆如椽此君語意當能傳○勝覽云龍洞在治東南四里

真如院巖穴峭深洞左右壁竒峭巨栢老蒼洞右有石角立舊經以爲孫登嘯臺陸游詩嘯臺載酒雲生屨仙穴尋梅雨墊巾卽指此有磨崖記宋隆興元年端午日榮守太史公李燾仁父書○余攷諸傳記所載榮雖山谷間實郡國一都會青陽門記云榮門有青陽洞以少昊國在其北門今正臨之故名按史黃帝子玄囂封于青陽國爲少昊金天氏少昊降居江水國于青陽以金德王位在西方集覽云江水在蜀青陽宋朝顛苑崔仰之送人牧榮州詩山色臨巴迥江流入漢清○邑東榮川

卽古遯水河岸有竹王祠蓋以祀夜郎王者蜀記云昔有女人于溪浣紗有大竹流水上觸之有孕後生一子自立爲王以竹爲姓漢武使唐蒙伐牂柯斬竹王土人不忘其本立竹王廟歲必祠之不爾爲人患薛濤題竹郎廟云竹郎廟前多古木夕陽沈沈山更綠何處江村有笛聲聲聲盡是迎郎曲漢地里志云縣有滇池周迴二百里水出駿馬日行五百里事同大宛又有馬鳴戍益州記云漢刺史韋拔夜過此地聞神馬嘶漢中馬嘶以應之故有此戍○成都市九州要記云和義郡古夜郎

之地武帝時開南中使爨道令通爨青衣道無功唐蒙將殺之令曰恨不見成都市而死蒙卽立市如成都以殺之故曰成都市按和義郡本屬瀘州寰宇記云唐貞觀八年割屬榮州○志云城西清富山有古榮王府按周榮公封國之後唐憲宗封其子曠宋真宗封子德雍孝宗封子光宗寧宗封子曦俱曰榮王縣舊有綾錦村杏春村皆宋藩封古迹也○朝野雜記天子卽位嘗所領州鎮自防禦州而下皆陞軍名若節鎮州則建爲府光宗自榮州刺史進封榮王而榮州不錫軍名蓋中書之

誤也南渡後始陞爲紹興府○宋名臣傳載李昉爲國子直講求郡晨登講席諸生見昉巾兩焰火起是日報得榮州蓋當時亦甚重之矣

眉州

直隸布政司在省城東一百八十里

領縣三

地在峩眉山陰以之名州自西魏始寔治嘉州若梁之齊通郡隋之通義郡唐之別置眉州則今理矣宋時陞爲防禦使治眉山縣蘇子瞻所謂眉州眉山共一城者也晉曾置江陽郡子由詩余生雖江陽蓋指此○方輿勝覽云臨風閣在州治內宋沈迥詩煙霞生座右林沼匝城隈○州園十詠邵

博著環湖在署後魏了翁築翠羽臺書臺遠景樓在州治北太守黎錞建蘇軾記雪臺在遠景樓前亦希聲築○三蘇祠在城內紗線街卽其故宅基門前榆樹云老泉手植竒怪礪礪人爭取去爲假山有觀蓮亭在祠右池中環沼皆蓮亭有小碑刻東坡小像李龍眠畫併山谷穎濱讚今移入寢室○洛城後漢時築蜀漢廢齊通城南齊建武置隋開皇廢右在州治東北○唐眉州劔羅城記大順二年盧拯撰文畧云象耳鎮于後峩眉列乎前嘉祐閣枕其上繪三蘇像刻東坡和陶詩于壁間宋

史唐末山行章攝眉郡守值四方驛騷乃合五縣之力城之周遭八里有奇計一千八百六十五丈名卧牛城宋淳化中李順之變攻圍累月不克○志云昔人評吾州山不高而秀水不深而清列眉通衢平直廣衍夾以槐柳綠陰翳然小南門城村家多竹籬桃樹春色可愛橋之下流皆花竹楊柳泛舟其間鄉人謂之小桃源蘇子瞻詩清江八城郭小浦生微瀾子由詩彷彿城南路繁香撲市橋○醴泉山在治西八里環繞州城山半有八角井清甘如醴松江在治東南自蜀江分派西南流至

州城與醴泉江合○蜀江在城外一名玻璃江水色清澈似之陸游詩云玻璃江水千丈深不如江上離人心君行未過青衣縣妾心先到峩眉陰金罇共酌不知曉月落煙渚天橫參車輪無角留不住馬蹄不方何處尋空憑尺素寄幽恨縱有綠綺誰知音愁來祇欲掩屏睡無奈夢斷聞疎砧范成大和云玻璃江頭春淥深別時泔泔流到今祇言日遠易排遣不道相思翻苦心烏頭可白我可去萑花易青君易尋人生若未免離別不如碌碌無知音蘇軾送楊孟容詩我家峩眉陰與子同一邦

相望六十里共飲玻璃江後人因立共飲亭又改爲江鄉館在津口○陸務觀詩又云玻璃江上柳如絲行樂家家要及時只怪今朝空巷出使君人日宴墓頤按墓頤山在江東七里狀如墓頤因名有至德觀爾朱洵丹泉舊記以爲軒轅氏丹宅山腹有穴曰龍洞傳者以爲四目老翁唐末有楊太虛得道于此今祠中有三仙象四目居中焉人日出東郊渡江遊墓頤山眉之故事也春風樓明霞閣俱在山上○蜀檇杙云僖宗幸蜀政事悉出內侍田令孜手左拾遺孟昭圖上疏論事坐貶令孜

遣人投之墓頤津後人爲立祠裴徹詩一章何罪死何名千載惟君與屈平從此蜀江烟雨夜杜鵑應作兩般聲右拾遺祠在墓頤山上今廢○老翁泉在墓頤山東二十里蘇明允嘉祐集云十數年前月夜有一老翁蒼頭白髮偃息泉上就之則隱而入于泉洵甃以石建亭覆之而爲之銘曰山起東北翼爲南西涓涓斯泉溢溢以彌斂以爲井可飲萬夫里無斯人將此爲誰山空寂寥或嘯而嘻更千萬年自潔自好誰其知之乃訖遇我惟我與爾將遂不泯無竭無濁以永千祀梅聖俞寄蘇明

允詩泉上有老人隱見不可常蘇子居其間飲水
樂未與淵中必有魚與子自猶羊淵中苟無魚子
特翫滄浪日月不知老家有雛鳳凰百鳥戢羽翼
不滯彼泉傍○蘇軾送賈訥倅眉二首當年入蜀
歎空回未見峩眉肯再來童子遙知頌襦袴使君
先已洗樽罍鹿頭北望應逢鴈人日東郊尚有梅
我老不堪歌樂職後生試覓子淵才又云老翁山
下玉淵迴手植青松三萬栽父老得書知我在小
軒臨水爲君開試看一一龍蛇活更聽蕭蕭風雨
哀便與甘棠同不翦蒼髯白甲待歸來自注先君

葬墓頤山之東二十餘里地名老翁泉君許爲一
徃感歎殊深故及之外史玄羽張大齡志云歐陽
永叔爲明允作志銘云公葬于彭山之安鎮鄉可
龍里在墓頤山之東地名石龍柳家溝老翁泉之
側或石可二字易誤嘉靖壬子臺史喻公按眉問
老泉墓檄有司求所在而修復之上下彭眉間數
月竟無所得于是從老翁泉之傍設一虛塚青神
余修撰承勛記其事于石又有廣福寺者乃勅賜
門下侍郎蘇轍香火院也宋故事宰相得賜寺院
薦福文定八相時有賜貶官後章呂盡追奪之復

官手詔再賜自爲文記之人以爲墳必在賜院之
近又乃就寺之後山更作一塚顧穎濱記中云墳
之西南十餘步有泉焉深廣不及尋晝夜瀦湧又
曰墳東南四里許有故伽藍轍以請于朝則前所
修泉傍者差是而廣福之墳非也但廣福傍有古
桂樹橫陰一畝大十圍亦非近代物若明允之族
譜亭則在州西南古修文鄉蘇氏祖塋側今亭廢
刻石亦不存矣○碑目云天池院去眉山縣十里
蘇文忠嘗過之今柱上有手書云自老翁并還偶
憇治平丁未十二月七日子瞻凡十八字○勝覽

云石佛山在眉山之南蘇子瞻寄子由詩石田向
何許石佛山下路下有爾家山千畦種秔稌山泉
宅龍蛭平地流膏乳有猪龍泉在今石佛鎮曾有
乳猪伏于此化二鯉蓋猪龍也詳見恠異記中志
載孫杵墓在石佛鎮乾明寺前寺有書樓山學碑
藏寺中卽宋賜孫公杵薦福地也○志云大旺山
在州東南五十里自墓頤山南趨或起或伏至此
峯巒屹立廻拱州城蓋與三峩氣接矣○息臺山
在治西四十里東館鎮北太平廣記載眉州有叟
嘗携子入此山遇一道人指其子曰天叟飲道人

已長跪求壽道人取簿檢視曰壽止十八叟與其子懇求不已乃舉筆改爲八十後子壽果如數焉
□大明寺近東館鎮隋建有九樓十八殿屋厦三千井亦十八眼基跡猶存又有燈壁寺在東館鄉宋紹興建東館書院紹興初眉州學者甚多州學不能容東館鄉士大夫呂君玘做古鄉校創爲學廟春秋釋奠以鄉士夫居家者主之丹稜令馮時行爲之記○連鰲山在州西南九十里山形如鰲傍卽栖雲寺東坡少時讀書寺中嘗于石崖上作連鰲山三字大如屋宇雄勁飛動其畫專車○余

讀魏華父書樓記曰孫氏居眉以著姓自唐迄今人物之懿史不絕書而爲樓以儲書則由長孺始樓建于唐之開元至光啓元年僖宗御武德殿書書樓二字賜之今石本尚存自僞蜀毀于災乃遷魚鰲其居爲佛氏所廬今所謂傳燈院是也若里巷則固以書樓名長孺之五世孫降衷嘗游河洛識藝祖皇帝于龍潛建隆初召至便殿賜衣帶圭田特授眉州別駕因市監書萬卷以還然樓尚未復也別駕之孫闢乃入都傳東壁西籬之副與官本市書摺載而歸卽所居復起重樓藏之魚鰲之

有樓則昉乎此又嘗除塾爲師徒講肄之所號山學于是士負笈景從而書樓山學聞名于時矣方樓之再建也在天聖初闢之從兄直講君堪嘗爲作記錢內翰希白宋景文子京皆賦詩闢性倜儻不耐衣冠衣方服其卒也從弟文懿公爲識其窶有不儒其身而儒其心之語故里人又以儒心名之比歲樓又燬于災書僅有存者儒心之六世孫曰某懼忝厥世乃更諸爽塏以唐僖宗所書樓刻揭之樓視舊增拓焉且病所儲之未廣走行闕下傳抄貿易以闕遺竭其餘力山學載興以余二十

年雅故嘗有請曰僕之用力于斯也亦旣屢勦公盍爲我書之以詔罔極余因惟昔人藏書之盛鮮有久而弗厄者梁隋之盛或壞于火或覆于砥柱唐太玄文昭之盛或毀于盜或散于遷徙本朝之初如江源叔所藏合江南吳越之書凡數萬卷而子孫不能有之爲臧僕盜去與市人裂之以藉物者不可勝數余偶過安陸亦得其省中所藏晉史則佚于他人者可知安陸張氏得江書最多其貧也一篋之富僅供一炊王文康初相周世宗多得唐舊書李文正所藏亦爲一時之冠而子孫皆不

克守宋宣獻兼有畢文簡楊文莊二家書可敵中秘之藏而元符中蕩爲煙埃晁文元累世之蓄校讐是正視諸家爲精自中原無事時已有火厄至政和甲午之灾尺素不存劉壯輿家于廬山之陽所儲亦博今其子孫無聞焉南陽开氏之書凡五十篋則盡歸諸晁氏嗚呼斯非天地神人之所靳者耶而孫氏之傳獨能于三百年間屢絕而復興則斯不亦可尚矣夫雖然余嘗聞長老言書之未有印本也士得一書則口誦而手抄惟恐失之其傳之艱蓋若此惟傳之艱故誦之精思之切辨之

審信之篤行之果自唐末五季以來始爲印書極于近世而閩浙庸蜀之鋟梓徧天下加以傳說日繁萃類益廣大綱小目彪列臚分後生晚學開卷瞭然苟有小慧纖能則皆能襲而取之噫是不過出入口耳四寸間爾若聖賢所以迭相授受若合符節者果爲何事而學之于人果爲何用則謾不加省然則雖克厨牝几于我何加焉可不甚懼矣夫○蘇文忠石氏畫范記曰石康伯字幼安眉之眉山人故紫微舍人昌言之幼子也舉進士不第卽棄去當以蔭得官亦不就讀書作詩以自娛而

已不求人知獨好法書名畫古器異物遇有所見脫衣輟食求之不問有無居京師四十年出入閭巷未嘗騎馬在稠人中耳目謾謾然專求其所好長七尺髯而黑如世所畫道人劔客而徒步塵埃中若有所營不知者以爲異人又善滑稽巧發微中旁人抵掌絕倒而幼安澹然不變色與人游知其急難甚于爲己有客京師而病者輒昇置其家親飲食之死則棺斂之無難色凡識幼安者皆知其如此而余獨深知之幼安識慮甚遠獨口不言耳今年六十二狀貌如四十許人鬚三尺郁然無一莖白者此豈徒然者哉爲亳州職官與富鄭公俱得罪者其子夷庚也其家書畫數百軸取其毫末雜碎者以冊編之謂之石氏畫苑幼安與文與可遊如兄弟故得其畫爲多而余亦喜其畫古木叢竹因以遺之使置之苑中

青神縣

在州城南八十里

本南安縣地後周置今縣以青衣江所注也蠶叢衣青而教蠶事蜀人神之故曰青神又曰其水濯衣卽青云○益州記曰青衣神號爲雷蜺廟班固以爲離蜺也蜀江至此始有峽之稱華陽國志望

帝以熊耳爲後戶熊耳峽卽今縣治郡國志云漢武帝使唐蒙破西南夷路始于此邑也○志云青州城梁置在治南十五里古青神郡縣皆治此自熊耳山視之今當爲百花鎮○黃山谷集云青神尉廳葺城頭舊屋作借景亭下瞰史家園水竹終日寂然了無人迹又當綠陰之間戲作長句云當官借景未傷民恰似鑿池取明月葢尉乃雅安張禮介卿山谷之中表也○縣東門外有青羊橋相傳老子騎青羊過此而入成都○長泉鎮有麒麟橋王蜀時麒麟見于此因立麒麟院○縣西瑞草

橋橋崩得殘碑乃蘇東坡與丈人丈母書也東坡外家在是所謂相望六十里共飲玻璃江者後洪雅王簿王宣義謝事家居于此東坡贈之詩云歸來瑞草橋邊路獨遊還佩平生壺○縣之名勝在乎三巖三巖者上巖中巖下巖也今惟稱中巖焉自縣解維始由芙蓉溪以兩岸多芙蓉也繼由五渡溪以溪水曲折凡五渡也又過慈姥磯有石刻李壁詩云洗盡一春歌酒塵蒼江吹破碧粼粼韶華過眼都如夢祇有三峯是故人泊舟直抵下巖有題名云子瞻子由與侃師至此院僧以路險見

止不知僕之所歷有百倍于此者矣丁未正月二十日書沿溪數折有喚魚潭上卽慈姥巖也篆刻中巖二大字徑可四尺河南邵博書陸務觀詩云春枕悠然夢何許兩枝筇杖喚魚潭又跋程伯正誼所藏山谷帖云此卷不應携在長安逆旅中亦非貴人席帽金絡馬傳呼八省時所觀程子他日幅巾筇杖渡青衣江相羊喚魚潭清泉翠樾之間與山中人掃石置風爐煮蒙頂紫茁然後出此卷共讀乃稱爾過潭循山三里始至寺爲中巖其傍有羅漢洞卽牛頭僧以木鑰叩石筍處此地懸崖

峭壁上刻千佛石覆如屋中有卧仙之迹有玉泉

坎黃山谷銘云玉泉坎坎來自重險發源無所龍

口琬琰我來峽中初酌蛙領靈湫殘缺百泉莫與

比甘山僧淳拙煮餅馨香遠拂淪茗泉味不揜行

爲白虹止爲方鑑口題此德用勒蒼古其上巖去

中巖一里許唐末有佛刹號垂拱寺相傳巖下有

龍聽僧講經于此由是建寺有三石筍唐無盡禪

師伏虎在石筍下所謂伏虎臺也范成大詩赤巖

倚竚嶙翠邏森成削峯蔚嵐氣重稀間暑光薄聊

尋大士處在扣洞門鑰雙撐紫玉關中轟翠雲幄

應供華藏海歸坐寶樓閣無法可示人但見雨花
落不知龍湫勝何似魚潭樂夜深山四來人靜天
一握驚看盃桂白月影到林壑門前六月江世界
塵漠漠寶餅有甘露一滴洗煩濁捫天援斗杓請
爲諸君酌山谷題云元豐庚辰歲秋多雨其八月
戊午晴游慈姥巖禮諾巨那尊者巖下有泉發山
足奔突色如乳而味甘取之不竭豈巨那所奉供
耶余因竭其舊水涸滌見石少焉復盈坎灑灑投
澗中喚魚潭投齋餘飯魚出食者數百見人不驚
眉山程逢時跋余玠詩云相公平賊後携吏上崢

嶠裴晉公以後無此竒遇醉翁行樂處草木皆可
敬歐陽子而後世無此樂先生晉公德業文忠詞
章書史精妙視鐘王有逸氣而于山林悠然心會
殆伯仲之間有裴歐也試語山靈自有宇宙便有
此山幾曾有此客耶□題名邵溥來紹興元年五
日旦從其弟博任資中張方自漢川易節益部將
母游弟嵩午猶子觀復二子知復甥何杓侍眉山
蘇禮偕來嘉定壬午二月旣望金華楊緯被命赴
闕艤舟巖下敬修尊者香火而去紹熙壬子孟冬
九日弟綜及男師復師晉同至□河陽郭忠得之

行部嘉眉艤舟巖下携子游中巖瞻拜尊者過憇
石筍庵歷覽勝境竒哉政和八年六月三日□里
人任逢被旨赴闕長子商輅侍行親友送別筍峰
者三十有九人嘉定丁丑十月癸酉□邑人楊大全
被旨進朝將家來修淨供宗黨親朋會別于此者
五十五人紹熙三年九月日□谷居翁大丞相趙
公留題淳祐壬子鄉貢方干此題名巖寺奎書適
從天來是秋楊異冠外省史夢錫在選中以山英
靈發越愈大浚儀趙公握奎平岡繼偕南宮第一
之客明年端午合邑士楊興仁申錫柄仲夢炎懌

森孫侯國史朝瑞彪錫王鉞文起之異已程方何
明磨崖大書以俊盛舉以開方來慶元戊午冬高
公純遣姪魏了翁赴龍飛策試艤舟來游男載夏
卿文卿定子姪游侍行越三年載定子褫褐行都
復侍親過此第夏卿文卿林卿長弟淞同山下飲
作伴留又二年癸丑秋十月了翁蒙恩召除侍東
去舍于眉信于青衣明日孫真勤飲餞于此兄弟
之偕行者如戊午獨伯仲不與紹定己丑六月丙
午郡人蘇薰侍諸父率四弟以嘉定戊寅上元日
游誦坡翁江山風月本無常主閒者便是主人語

信然也第黨書愁霖貫序人心久鬱秋季之日晴
景開霽草木悅茂江山清新太子宮史籍聖源命
前王穆伯恭及前進士楊穎臣廷芳進士程戩景
貺羽衣李有慶仲祥出色東津亭方舸南下登石
徑數里游中巖僧居清晏薄暮間道而歸試校書
郎領簿馮越石君玉俾識其時乃嘉祐丁酉之歲
也景貺題○辛亥歲任友楚人鍾惺來游作記云
去青神西南十五里江色盡綠玉中邊皆見隔岸
坐立數山若架閣者中巖也巖下上連延可十數
里許迴流峻壁冥壑複磴竹樹蒙籠大要向背往

復皆與此巖終始渡江卽水月樓樓趾齧江寺冠
之由樓視江則已頰由寺登樓乃反降階垂窮與
樓湊階代樓爲梯者強半揣本齊末度樓之腰猶
未能至乎寺趾也降自樓出山門右行不見江則
摩磴如蟻屢折爲喚魚潭魚聽掌出石壁百仞立
而微頰潭湫其脰石無完膚有邵伯温大書可模
並壁行數武爲羅漢洞洞低曲樓而入如行牛角
中隙處稍右則爲伏虎巖鏡巖爲百千萬億佛如
恒河沙數巖之半跨壑爲一小石橋銜木其壁爲
閣若居人架竹梁上以承燕巢者人屈曲行其下

沿緣洞壑俯仰竹石者數里曰此走井研富順道也巖又半爲流杯池一名太極池有屋數楹屋後爲泉泉流洞中石壁四周有黃魯直大小二石刻壁間宋元刻頗多每兩石縫接處徃徃上下各截其半中嵌俗筆亦有居石隙苟完者出洞緣磴行輿步數代去所謂羅漢洞伏虎巖者度可四三里乃復覩前鑿巖佛像須眉歷歷可數才隔一壑尋槿可度疑前此一段途徑可省矣大抵喚魚潭以徃行窺壑石壁夾之若岸壑若溪藤蘿虧蔽壑中若昔與洲樹如槎根若石猿鳥徃來若游魚特無

水耳諸峯映帶時讓時爭時逢時應時拒時迎裒益避就準形匠心橫豎參錯各有妙理不可思議又行里許躡蹬十級乃睹古中巖題額去三石筓不遠所謂諾詎那尊者引牛頭僧持鑰扣石筓筓開得低頭佛盜珠是也鍾子曰自中巖至尊者巖從下視上項踵腹背其石脈皆當爲筓筓隙且平處則置屋久則鑿磴斷則爲橋處危臨深則設石欄欄則復見江從江中望巖上僧舍佛刹雖一居之內前軒後寢纍纍綴高壁上下疊而不覺其前後通也登巖行屋中皆磴道乃稍得其要領趾後

竟即磨前頂石筍中分處如一門尊者像處其中
 右旋復為佛殿殿傍一筍屹若浮屠與中分者而
 三實一筍也人直指其巋然三峰者為石筍耳筍
 上宋元刻亦多俗書災石者亦復倍之萬曆辛亥
 十月二十一日晚霽與弟恬及艾子登于中巖焉
 禮諾詎那尊者畢說偈偈曰偶爾喪珠復返急時
 扣鑰相求未免勞勞多事世尊不合低頭又曰未
 必衣珠真失總緣巖石當開自供羅漢游戲不管
 山僧往來說偈訖返曰余凡三過中巖皆有詩其
 二云中巖如化出秀色顛烟含到鳥無歸路游魚

或泳潭泉聲隨地有石筍與天參若作此山長干
 心無不堪其二再識中巖好彌添乍到清泉流因
 委曲雨氣益淒清橋險必當度樓虛何所成惟應
 石筍上安坐學無生其三莫謂客來數聊無塵俗
 牽巖光浮落日梅意入初年手搨碑文古身行洞
 穴連白魚灘寂意且宿在灘前蓋佺寂後游同青
 神令康君視搨山谷諸碑刻又自梓州牛頭洞來
 故及之

彭山縣 在州城北
四十里

秦之武陽梁之靈石也漢昭帝已後及晉宋犍為

郡皆置于此隋置隆山縣屬陵州唐貞觀初以縣屬眉山因界有彭女山爲名又曰取彭亡山岑彭所惡也隆彭皆高大之稱義或取此○揚雄蜀記秦惠王遣張儀司馬錯伐蜀蜀王開明拒戰不利退走武陽獲之郡國志云漢元光四年益州刺史任安城武陽周圍千三百丈本志云今縣東十里舊土城是有任公橋後漢朱褒獲麟于馬頰嶺因改名爲麒麟橋○縣治西北五里犍爲城漢建元中築卽犍爲郡理也碑曰云漢犍爲太守楊洪碑在彭山縣北小板橋五十年前餘楊洪碑三字今

皆磨滅○華陽國志云治去成都百五十里渡大江昔人作大橋曰漢安橋廣一里半每秋夏水盛斷絕歲歲修理百姓苦之建安二十一年太守南陽李嚴乃鑿天社山尋江通車道省橋梁三津吏民悅之嚴因更造起府寺觀壯麗爲一州勝其地東接江陽南接朱提北接蜀郡西接廣漢按晉永和○中置西江陽郡其名取此唐沈宇武陽送別詩菊黃蘆白鴈初飛羌笛胡琴淚滿衣送君腸斷秋江水一去東流何日歸○郭璞江賦云流二江于岷嶽注岷山北江所出岷山即岷山也中江所出

皆東注于大江○寰宇記云岷嶽山在縣東北十
二里導江從山南合流下有漢張剛墓綱字文紀
犍爲武陽人仕廣陵太守平賊黨張嬰有恩卒之
日嬰率其徒五百人送喪還武陽負土成墳而去
按岷嶽二山在漢嚴道界其尾入江○雲笈七籤
第五北平治在眉州彭山縣上有池水縱廣二百
步昔越人王子喬得仙處碑目云此山有大書北
平山治之碑餘不可讀碑陰書大唐上元二年道
士施仕衡等字按志縣北四十里北平治應室宿
上有天柱峯夜常見五色燈山下有王喬墓唐杜

光遠詩桐栢真人曾此居焚香崖下誦靈書朝回
時宴三山客澗盡閒飛五色魚天柱一峯凝碧玉
神燈千點散紅蕖寶芝常在知誰得好駕金蟾八
太虛○南中八郡志云犍爲有魚鳧津數百步一
名彭女津在彭亡山南導江皂江等水會處彭祖
塚及祠在焉後漢將軍岑彭爲刺客所中而死又
名彭亡山亦名平模山郡國志謂之朝女山云昔
有朝祖女于此山得道今足跡尚存右距治北十
二里曰彭女彭模平模平無皆一山○神異記云
犍爲有一白虎出則衆黑虎隨之不傷人物漢王

褒招碧鷄神詞黃龍見兮白虎仁蓋指此也寰宇
記引秦昭王射白虎事非○李膺益州記云周德
既衰九鼎淪散一汲于此或見其鼻故名鼎鼻山
一名打鼻山上有城亦名鼎鼻打鼻音近大江過
于山下有灘宋將朱齡石伐蜀立寨于此括地志
云鼎鼻山北有龍洲東接導江水按已上卽常璩
所稱王喬升其北山彭祖家其彭蒙白虎仁干廣
德寶鼎見于江溉也○漢書綏和五年犍爲人上
寶磬十六此地因謂之寶磬洲○益部耆舊傳朱
遵武陽人仕爲功曹率兵拒公孫述絆馬死贈復

漢將軍有祠○後漢建安二十四年黃龍見赤水
九日劉氏以爲瑞應因立廟在長江村導江東岸
碑目云漢刻黃龍甘露之碑在彭山黃龍鎮今移
于繫龍橋周地圖記云彭山縣北四里有潭水後
漢漢安元年仙人瞿君武入峩眉山得道每年繫
龍于灘龐籍詩巢鳳閣邊勞遠夢繫龍灘下認前
題按已上卽常璩所稱犍爲上寶磬十六劉向以
爲美化所降後漢朱遵拒公孫述光武以爲士大
夫郡建安末年黃龍見武陽赤水蜀人以爲劉氏
之瑞應也寰宇記云金華山在彭山縣東五里有

丈六佛像夜多神燈○紀勝云縣東北六里盤石
山晉照寺藏有宋太宗真宗仁宗御書巖之半有
石室范鎮詩窮幽訪盤石細徑入荒涼踏葉履屨
濕觸花衣袂香○方輿記平蓋山在彭山縣北二
十四化之一也七籤云山下有玉人長一丈三尺
昔吳郡崔孝通于此學道得仙本志云平蓋治上
應婁宿治前洗墨池唐隱士羅公遠題詠之處有
清暉滌覽二亭提刑張方記以爲在鼎鼻山椒而
勾氏之逍遙軒恰與之相對云杜光遠詩勢壓長
江空八陣吳都仙客此修真寒江向晚波濤急深

洞無風草木春江上玉人應可見洞中仙鹿已來
馴龍車鳳輦非難遇只要塵心早出塵亡名氏詩
平蓋山高古木疎昔人曾此築仙居井通八角寒
泉湧觀燬三清劫火餘洗墨池邊丹竈冷繫龍巖
畔石潭虛吟成獨坐荒苔上閑看蝸牛學篆書○
七籤云本竹觀在彭山治北相傳以爲竹林黃帝
所手植者杜光遠詩樓閣層層觀此山雕軒朱欄
一躋攀碑刊古篆龍蛇動洞接諸天日月閑帝子
影堂香漠漠真人丹澗水潺潺掃空雙竹今何在
只恐投波去不還○楊祐甫彭山十事記一日象

耳山二曰彭祖宅三曰大悲道場四曰寶現磨鍼
二溪五曰太白書臺有石刻太白留題云夜來月
下卧醒花影零亂滿人襟袖疑如濯魄于冰壺也
杜光庭詩山中猶有讀書臺風掃晴嵐畫障開花
月冰壺依舊在青蓮居士幾時來六曰師悟志栖
二大士會昌寺七曰薛范二詩八曰龍池鱗泉九
曰千歲松栢十曰石恪畫護法神○按縣東北二
十五里有磨鍼溪在象耳山下相傳李白讀書山
中學未成棄去適過是溪逢老媪方磨鐵杵問何
爲曰欲作鍼耳白感其言遂還卒業媪自言武姓

傍有武氏巖文同題象耳山寺轉谷縈巖路始窮
隔林遙望一門通溪山俱在見聞外臺殿盡藏懷
抱中像閣崇恩明海日經幢瓔珞撼天風勞生又
逐輕舸去珍重高僧解苦空○碑目縣北四十里
有古塔刻云唐中和三年浴佛日知玄禪師自成
都游峩眉還至此山愛其幽僻遂立菴于上名曰
知玄菴按已上卽酈道元所稱武陽龍尾仙者羽
化之所神栖白雲屬想芳流藉念泉鄉遺詠在茲
也○寰宇記云馮翊王廟在縣東五里古老相傳
有漢馮翊王郭子明墓按漢書功臣非賜姓者不

得封王恐此非實

丹稜縣在州城北八十里

志云赤巖山在治北二十里高聳赤色如鳥旂之狀拱翼縣治雖林木叢茂不能蔽之其下卽多稜川縣名取此○漁隱叢話云花卿冢在丹稜之東館鎮至今猶顯英氣血食其鄉按花卿字敬定本關中人唐至德間從崔光遠入蜀討段子璋有功後平寇亂單騎鏖戰喪其元猶操戈至東館鎮下馬沃盥適遇浣紗女謂曰無頭何以盥爲遂自僵仆居民葬之溪上廟祀不絕宋封爲忠應公邵博

云州西有花將軍廟廟史以匣藏唐至德元年十月鄭丞相誥云花敬定將軍也謝臯羽花卿冢行二云濕雲模糊埋秋空雨青沙白丹稜東莓苔陰陰草茸茸云是花卿古來冢花卿舊事人所知花卿古冢知者誰精靈未歸白日西廟鴉啄肉枝上啼縣州柘黃魂正飛按綿州疑是綿川有綿水縣後魏所置入彭山縣○志云縣北十五里龍鵠山三大字宋孝宗書也有松栢山碑記云山有三宮九觀乃成無爲楊正見李鍊師成道處唐天寶間建杜光遠題龍鵠山詩抽得閒身伴瘦筇亂敲青碧

喚蛟龍道人掃徑收松子缺月初懸天在峯又自
題詩云已作清時鳥倦飛杜鵑何事更催歸似嫌
住處猶城郭不解携家隱翠微其子壁詩云蕭條
白日閉巖扃留作游人萬古情猶有山中舊時鹿
舉頭如聽讀書聲○縣有楊素翁者奇士從黃魯
直游盡刻杜子美兩川詩于眉山所謂大雅堂也
魯直記畧曰余謫居黔州盡書子美夔峽兩川諸
詩以遺丹稜素翁俾刻諸石使大雅遺音久湮沒
而復盈三巴之耳素翁乃作高屋廣楹以庇此石
因請名焉余名之曰大雅堂仍為作記

